

三主要道

敬禮至尊諸上師

一、一切佛語心要義 諸聖佛子讚揚道

有緣求脫者津梁 我當隨力而宣說

二、彼不貪著輪迴樂 為令暇滿不空過

勸依佛喜道諸賢 具清淨心善諦聽

三、無真出離難止息 捨求有海安樂果

貪著有樂能縛身 是故首當出離心

四、暇滿難得壽不留 修習能斷今世欲

業果不爽輪迴苦 數思能斷來世欲

五、至於輪迴圓滿事 不生剎那之希願

晝夜恆求解脫心 生時即起出離心

六、出離若無淨發心 執持修習終不成

無上菩提圓滿因 智者當發菩提心

七、四大瀑流猛漂激 業繩緊縛難掙脫

既入我執堅鐵網 復被無明大闇蔽

八、無邊生死生復生 三苦逼害恆相續

審思如斯眾慈母 當應引發殊勝心

九、不具通達實相慧 雖修出離菩提心

終不能斷生死根 應勤通達緣起法

十、能見世出世間法 果隨因行永不誣

能滅實執諸所緣 此乃正入佛喜道

十一、現分緣起不欺誑 空分遠離實執意

若時二者別現見 爾時仍昧牟尼旨

十二、現見緣起全不誣 即滅實執取境相

若時同起非更迭 乃圓成正見觀察

十三、此復現相除有邊 及以空性除無邊

若知現空顯因果 不為邊執見所奪

十四、如是聖道三關要 若得如實通達時

子應依靜勤精進 發奮速即修究竟